



Broj: 01,02,03,04/1-05-1-404/13
Sarajevo, 4. 2. 2014.

**IZVJEŠTAJ S PRVOG DIJELA REDOVNOG ZASJEDANJA PARLAMENTARNE
SKUPŠTINE VIJEĆA EVROPE, STRAZBUR,
27. - 31. 1. 2014.**

U Strazburu je od 27. do 31. 1. 2014. održan prvi dio plenarnog zasjedanja Parlamentarne skupštine Vijeća Evrope kojem je prisustvovala Delegacija Parlamentarne skupštine BiH u Parlamentarnoj skupštini Vijeća Evrope, u kojoj su bili:

1. Milica Marković, članica Delegacije
2. Borjana Krišto, članica Delegacije
3. Saša Magazinović, član Delegacije
4. Senad Šepić, član Delegacije
5. Ismeta Dervoz, zamjenica člana Delegacije
6. Sevda Valjevčić, sekretar Delegacije, i
7. Adnan Bešić, prevodilac.

27. 1. 2014.

Zasjedanje je počelo izborom novog predsjednika Parlamentarne skupštine Vijeća Evrope, te je već u prvom krugu na tu dužnost izabrana **An Braser**, čime je postala druga žena predsjednica Parlamentarne skupštine u njenoj historiji. An Braser iz Luksemburga (ALDE grupa), sa osvojenih 165 glasova, pobijedila je člana Grupe evropskih demokrata (EDG) **Roberta Valtera** iz Velike Britanije.

Nakon obavljenog izbora predsjednika, Skupština je također izabrala 19 potpredsjednika PS Vijeća Evrope. **Bosna i Hercegovina je jedina pozvana zemlja članica (u skladu s Pravilnikom o rotaciji zemalja članica Vijeća Evrope) koja nije imala svog kandidata, odnosno koja nije dostavila ime kandidata za dužnost potpredsjednika PS Vijeća Evrope, tako da je mjesto potpredsjednika PS Vijeća Evrope namijenjeno za predstavnika Delegacije BiH ostalo upražnjeno odnosno nepopunjeno. Vijeće Evrope obavijestio je PSBiH 9. 12. 2013. o potrebi imenovanja potpredsjednika iz Delegacije PSBiH, a istu informaciju dostavila je i sekretar Delegacije, u namjeri da se odluka donese u traženom roku.**

Parlamentarcima se tokom prvog dana zasjedanja u ime Austrije, zemlje koja trenutno predsjedava Vijećem Evrope, obratio ministar vanjskih poslova Austrije **Sebastian Kurc**, koji je naglasio potrebu jače odbrane slobode izražavanja i slobode medija, kao i potrebu jače zaštite prava azilanata i izbjeglica koji, kako je rekao, predstavljaju posebne žrtve diskriminacije.

Članovi Delegacije PSBiH imali su brojne bilateralne sastanke s članovima drugih nacionalnih delegacija, aktivno su učestvovali na plenarnom zasjedanju, te na sastancima komiteta, kao i političkih grupa Skupštine čiji su članovi, a koji se svakodnevno održavaju tokom plenarnog zasjedanja.

28. 1. 2014.

Delegacija BiH se tokom drugog dana zasjedanja susrela s novoizabranim izvjestiocem Monitoring komiteta PS Vijeća Evrope za BiH **sir Rodžerom Galeom** iz Velike Britanije, koji je imenovan umjesto gđe Karin S. Voldset iz Norveške. Tokom susreta razmijenjene su informacije o trenutnoj političkoj situaciji u BiH, vođeni su razgovori o mogućoj skoroj posjeti izvjestilaca Bosni i Hercegovini, te inicirana produktivna saradnja između delegacije i izvjestilaca u narednom periodu.

Istog dana, slijedom svog mandata EPP, najbrojnija politička grupa u PS Vijeća Evrope, predložila je poslanicu **Ismetu Dervoz**, članicu Delegacije PSBiH u PS Vijeća Evrope, za prvu potpredsjednicu Komiteta za ravnopravnost i nediskriminaciju PS Vijeća Evrope. Komitet je jednoglasno podržao imenovanje. Ovo je prvo imenovanje člana Delegacije PSBiH u neki od komiteta PS Vijeća Evrope.

Članovi Delegacije susreli su se i s ambasadorom BiH u Strazburu **Almirom Šahovićem**. Tokom razgovora razmijenjene su informacije o dosadašnjem napretku BiH u ispunjavanju preuzetih obaveza, kao i o mogućim budućim koracima ususret predsjedavanja BiH Komitetom ministara Vijeća Evrope (maj-novembar 2015.).

Tokom rasprave o slučaju Magnitski, Vijeće Evrope preporučilo je državama članicama da slijede primjer SAD-a i uvedu ciljane sankcije protiv svih uključenih u smrt ruskog advokata Sergeja Magnitskog, kao što je zabrana izdavanja viza i zamrzavanja računa, ako nadležna tijela u Rusiji ne reaguju adekvatno u razumnom vremenskom periodu. Usvojenom Rezolucijom 1966 (2014), na osnovu izvještaja izvjestioca gosp. Andreasa Grosa iz Švicarske, Skupština je pozvala ruske vlasti da u potpunosti istraže okolnosti i pozadinu smrti gosp. Magnitskog, kao i moguću krivičnu odgovornost svih zvaničnika uključenih u taj događaj.

Na osnovu zajedničke rasprave o prevenciji rasizma i netolerancije na tlu Evrope kao i borbi protiv rasizma u policiji koja je održana drugog dana usvojena je Rezolucija 1968 (2014) o strategiji za sprečavanje rasizma i netolerancije u Evropi gosp. Davida Daviesa iz Velike Britanije, kao i Rezolucija 1967 (2014) o načinima sprečavanja rasizma u policiji gosp. Jonasa Gunarsona iz Švedske. Komitet za ravnopravnost i nediskriminaciju PS Vijeća Evrope je u toku rasprave u plenumu predstavljala prva zamjenica predsjedavajuće Komiteta članica Delegacije PSBiH Ismeta Dervoz.

Posebnu pažnju privuklo je obraćanje generalnog sekretara Vijeća Evrope **Torbjorna Jaglanda**, koji je pozvao zemlje članice da pojačaju napore s ciljem smanjenja socijalnih nejednakosti u društvu, te je posebno istakao značajnu ulogu Vijeća Evrope u promoviranju slobode izražavanja, privatnosti i globalnog upravljanja internetom.

29. 1. 2014.

Delegacija BiH pri Parlamentarnoj skupštini Vijeća Evrope susrela se s predstavnicima MONEYVAL-a **Džonom Ringutom i Janom Klajsenom**, na njihov zahtjev. MONEYVAL predstavlja primarni mehanizam Vijeća Evrope za ocjenu mjera koje se koriste protiv pranja novca i finansiranja terorizma. MONEYVAL je posljednji put ocijenio BiH u junu 2009. godine. Uzajamni evolucionni izvještaj usvojen je u decembru 2009. Četvrti krug evaluacija usklađenosti zakonodavstva BiH sa standardima Vijeća Evrope trebalo bi da bude održan u novembru, a u aprilu bi BiH trebalo da posjete članovi "misije visokog nivoa" MONEYVAL-a. Predstavnici MONEYVAL-a izrazili su zabrinutost zbog činjenica da BiH do sada nije uspjela da ispuní predviđene obaveze. Ukazali su na činjenicu da je prema posljednjoj evaluaciji naša zemlja do sada ispunila 33 od 110 postavljenih ciljeva. Da bi četvrta evaluacija bila uspješna, BiH treba da usvoji zakon o sprečavanju pranja novca i finansiranja terorističkih aktivnosti te izmjene Krivičnog zakona BiH u ovom segmentu. Zamolili su članove Delegacije da parlamentarcima u PSBiH prenesu ove informacije i poruke te da se lično angažiraju kako bi pomenuti zakoni bili što prije usvojeni.

Posebnu pažnju trećeg dana zasjedanja privuklo je izlaganje predsjednika Evropskog parlamenta **Martina Šulca**, koji je potvrdio sinergiju između dvije organizacije i naglasio da će odnosi između Evropskog parlamenta i PSVE sigurno jačati. Posebno je istakao sinergiju u okviru poštivanja ljudskih prava, očuvanja demokratije i stabilnosti vladavine prava.

Istog dana vođene su rasprave o uticaju interneta na politike, o dramatičnoj humanitarnoj krizi izbjeglica iz Sirije, te o pitanju migranata u okvirima evropskih država. Na osnovu tih rasprava usvojene su Rezolucija 1970 (2014.) o internetu i politici, kojom je naglašeno da treba iskoristiti priliku da se zahvaljujući internetu i društvenim mrežama uspostavi direktan kontakt između građana i političara, Rezolucija o pitanju sirijskih izbjeglica 1971 (2014.), kojom se izražava zahvalnost svim onim zemljama koje su do sada primile značajan broj sirijskih izbjeglica, kao i Rezolucija o migrantima 1972 (2014.) i Rezolucija o testovima integracije 1973 (2014.).

30. 1. 2014.

Skupština je obavila raspravu po hitnoj proceduri o Ukrajini, tokom koje je rečeno da ukrajinske vlasti treba da stupe u "otvorene, iskrene i efikasne pregovore s opozicijom". Skupština pozdravlja odluku ukrajinskih vlasti o ukidanju Zakona o zabrani demonstracija, što, kako je rečeno, predstavlja "prvi korak" ka mirnom rješenju političke krize.

Rezolucijom 1974 (2014.) o funkcioniranju demokratskih institucija u Ukrajini, koja je usvojena na osnovu izvještaja gđe Mailis Reps iz Estonije i gđe Mariete de Purbe-Lundin iz Švedske, Skupština poziva policiju i demonstrante da se suzdrže od bilo kakvog nasilja ili akcija koje bi mogle izazvati nasilne reakcije druge strane, te naglašava da pretjerana i nesrazmjerna upotreba sile od policije predstavlja kršenje ljudskih prava.

Prisutnima se istog dana obratio austrijski kancelar **Verner Fajman**, koji je govorio u velikoj stopi nezaposlenosti mladih u Evropi, te je pozvao evropske vlade da preduzmu ispravne korake s ciljem smanjenja nezaposlenosti. Austrijski kancelar upozorio je da Evropi ako se ništa ne učini po tom pitanju, prijete masovna nezaposlenost, siromaštvo i politička

nestabilnost. U svom govoru također je osudio diskriminaciju homoseksualaca u nekim državama članicama Vijeća Evrope.

31. 1. 2014.

Petog dana zasjedanja usvojena je Rezolucija 1921 (2013.) o obavezama međunarodnih organizacija da odgovaraju za svoja djela ako prekrše ljudska prava. Na osnovu Rezolucije, Skupština je sačinila niz preporuka za povećanje odgovornosti međunarodnih organizacija. U usvojenom tekstu, koji se zasniva na izvještaju izvjestioca Hose Marije Beneita iz Španije, predlaže se da međunarodne organizacije budu predmet obavezujućeg mehanizma odgovornosti i da njihov imunitet bude ograničen.

Pripremila¹
sekretar Delegacije
Sevda Valjević

Dostavljeno:

- kolegijima oba doma PSBiH
- Komisiji za vanjske poslove PDPSBiH
- Komisiji za vanjske i trgovinsku politiku, carine, saobraćaj i komunikacije Doma naroda PSBiH
- Delegaciji PSBiH u PSVE
- Kolegiju Sekretarijata
- Sektoru za međunarodne odnose i protokol
- Ministarstvu vanjskih poslova BiH
- a/a

¹ Uz saglasnost članova Delegacije